

Bosna i Hercegovina
Federacija Bosne i Hercegovine
Srednjobosanski kanton/Kanton Središnja Bosna

KANTONALNI SUD U NOVOM TRAVNIKU

Broj: 06 0 K 007724 14 K

Novi Travnik, 06.10.2015. godine

U IME FEDERACIJE BOSNE I HERCEGOVINE !

Kantonalni sud u Novom Travniku, u vijeću sastavljenom od sudaca Mehmedalije Huseinović kao predsjednika vijeća, Mirjane Grubešić i Alme Islamović, kao članova vijeća, uz sudjelovanje Bose Zlatunić, kao zapisničara, u krivičnom predmetu protiv optuženog Josipa Relota, zbog krivičnog djela ratni zločin protiv civilnog stanovništva iz člana 142. stav 1. preuzetog Krivičnog zakona Socijalističke Federativne Republike Jugoslavije u vezi sa članom 22. istog zakona, optuženog po optužnici Tužiteljstva Bosne i Hercegovine broj T 20 0 KT-RZ 0000021 07, koja je nakon ustupanja spisa predmeta po rješenju Suda Bosne i Hercegovine broj S1 1 K 009254 14 Kv 2 od 24.12.2014. godine, izmjenjena od strane Kantonalnog tužiteljstva Travnik dana 10.07.2015. godine i sada nosi oznaku broj: T06 0 KTRZ 0015080 15, nakon usmenog i javnog glavnog pretresa održanog dana 28.09.2015. godine, u prisustvu optuženog Josipa Relota osobno, braniteljice optuženog Branke Praljak, odvjetnice iz Novog Travnika i zastupnika optužbe Ahmeda Mešić kantonalnog tužitelja Kantonalnog tužiteljstva Travnik, nakon obavljenog vijećanja i glasanja, dana 06.10.2015. godine, u prisustvu optuženog osobno i njegove braniteljice, a u odsustvu uredno obavještenog zastupnika optužbe, donio je i javno objavio, slijedeću:

PRESUDU

Optuženi:

JOSIP RELOTA zv. „Čombe“, sin Ive i majke Janje rođene Krišto, rođen 19.05.1967. godine u Zenici, nastanjen u Busovači, Polje bb, [REDACTED]

KRIV JE

Što je u vrijeme rata u Bosni i Hercegovini i oružanog sukoba između postrojbi HVO i jedinica Armije R BiH, u toku 1993. godine na području općine Busovača, kao pripadnik HVO i to II Bojne brigade „Nikola Šubić Zrinski“, zajedno sa drugim nepoznatim pripadnicima HVO postupao suprotno pravilima člana 3. Ženevske konvencije o zaštiti civilnog stanovništva od 12.08.1949. godine i odredbama člana 4. stav 1. i 2. tačka a) Dodatnog protokola II uz Ženevske konvencije o zaštiti žrtava nemeđunarodnih oružanih sukoba od 08.06.1977. godine,

tako što je:

krajem januara 1993. godine nakon otpočinjanja sukoba u Busovači između HVO i Armije R BiH u ranim večernjim satima, kao pripadnik II Bojne brigade „Nikola Šubić Zrinski“ HVO Busovača sa još dva njemu poznata uniformisana pripadnika HVO u naselju Luke, općina Busovača, svi naoružani automatskim puškama ušli u porodičnu kuću B1 u kojoj su boravili civili: B1, Nijaz Neslanović, Midhat Hadžibegović i Fikret Husanović, te je odmah po ulasku Josip Relota krenuo sa ispitivanjem prisutnih civila, maltretirao ih, pri tom je im verbalno prijetio i tražio da izvade novac i zlato, izazivajući kod njih veliki strah, da bi u jednom trenutku Josip Relota dao znak drugoj dvojici nepoznatih pripadnika HVO, nakon čega su zajedno izašli iz prostorije, gdje se začulo repetiranje njihovih pušaka, da bi odmah zatim Josip Relota i druga dvojica nepoznatih pripadnika HVO ušli u sobu i odmah počeli pucati iz automatskih pušaka u prisutne civile, kojom prilikom su ubijeni Nijaz Neslanović, Midhat Hadžibegović i Fikret Husanović, dok je B1 ostao nepovrijeđen, nakon čega su Josip Relota i druga dva nepoznata pripadnika HVO napustili kuću B1, te je kroz balkonski prozor kuće ubačena eksplozivna naprava granata koja je eksplodirala u sobi i od čijeg je gelera okrznut B1 po glavi, koji je potom napustio svoju kuću i sakrio se u blizini kuće Saliha Hodžić, da bi poslije bio odveden u Kaonik.

Dakle,

Kršeci prava međunarodnog humanitarnog prava nečovječno postupao i počinio ubistva civilnih osoba,

čime je počinio krivično djelo ratni zločin protiv civilnog stanovništva iz člana 142. stav 1. preuzetog KZ SFRJ u vezi sa članom 22. istog zakona,

pa ga sud uz primjenu istog zakonskog propisa i uz primjenu odredaba članova 38. i 41. preuzetog Krivičnog zakona Socijalističke Federativne Republike Jugoslavije

OSUĐUJE

na kaznu zatvora u trajanju od 11 (jedanaest) godina

Na temelju člana 202. stav 1. Zakona o krivičnom postupku Federacije Bosne i Hercegovine optuženi Josip Relota se obavezuje da plati troškove krivičnog postupka s tim da se ovom presudom obavezuje da na ime paušala plati iznos od 100,00 (stotinu) KM u roku od 15 dana od dana pravomoćnosti presude, dok će sud o visini preostalih troškova donijeti posebno rješenje.

Na temelju člana 212. stav 3. Zakona o krivičnom postupku Federacije Bosne i Hercegovine, porodice ubijenih Nijaza Neslanović, Midhata Hadžibegović i Fikreta Husanović se sa imovinsko-pravnim zahtjevima upućuju na parnični postupak.

Zapisničar
Bosa Zlatunić

Predsjednik vijeća
Mehmedalija Huseinović